



INFORME DE LEGALIDADE SOBRE O “PROXECTO DE DECRETO POLO QUE SE FIXAN OS PREZOS CORRESPONDENTES AOS ESTUDOS CONDUCENTES Á OBTENCIÓN DE TÍTULOS UNIVERSITARIOS DE CARÁCTER OFICIAL E VALIDEZ EN TODO O TERRITORIO NACIONAL NO ENSINO UNIVERSITARIO PARA O CURSO 2016/2017.”

Esta Secretaría Xeral Técnica de conformidade co artigo 43.2 da Lei 16/2010, de 17 de decembro, de organización e funcionamento da Administración xeral e o sector público autonómico de Galicia, en relación co “proxecto de decreto polo que se fixan os prezos correspondentes aos estudos conducentes á obtención de títulos universitarios de carácter oficial e validez en todo o territorio nacional no ensino universitario para o curso 2016/2017”, emite o seguinte:

INFORME

1.Marco normativo e competencial

O artigo 31 do Estatuto de autonomía de Galicia, aprobado pola Lei orgánica 1/1981, do 6 de abril, sinala que é da competencia plena da Comunidade Autónoma galega o regulamento e administración do ensino en toda a súa extensión, niveis e graos, modalidades e especialidades, no ámbito das súas competencias, sen prexuízo do disposto no artigo 27 da Constitución e nas leis orgánicas que, conforme o apartado primeiro do artigo 81 da mesma, o desenvolvan, das facultades que lle atribúe ó Estado o número 30 do apartado 1 do artigo 149 da Constitución e da alta inspección precisa para o seu cumprimento e garantía.

O artigo 81.3b) da Lei orgánica 6/2001, do 21 de decembro, de universidades, na redacción dada polo Real decreto lei 14/2012, do 20 de abril, de medidas urxentes de racionalización do gasto público no ámbito educativo, determina que a Comunidade Autónoma fixará os prezos públicos e dereitos dos estudos conducentes á obtención de títulos de carácter oficial e validez en todo o territorio nacional dentro dos límites que estableza a Conferencia Xeral de Política Universitaria.

Para os restantes estudos, serán fixados polo consello social da respectiva universidade, de acordo co disposto no artigo 81.3.c) da citada lei orgánica, e no artigo 75.3.f) da Lei 6/2013, do 13 de xuño, do Sistema Universitario de Galicia.

Segundo o artigo 29 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, corresponde á secretaría xeral técnica emitir informe sobre os anteproxectos de lei e proxectos de regulamentos da consellería e tramitalos.

2. Acerto e oportunidade

Como xa se sinalou, a Lei orgánica 6/2001, do 21 de decembro, de universidades determina que a Comunidade Autónoma fixará os prezos públicos e dereitos dos estudos conducentes á obtención de títulos de carácter oficial e validez en todo o territorio nacional dentro dos límites que estableza a Conferencia Xeral de Política Universitaria.

A Lei 8/1989, do 13 de abril, de taxas e prezos públicos, outórgalle aos referidos importes a consideración de prezos públicos; pola súa parte, a Lei 6/2003, do 9 de decembro, de taxas, prezos e exaccións reguladoras da Comunidade Autónoma de Galicia, establece no seu artigo 43 que se entende por prezos públicos.

Resulta necesario proceder á fixación dos ditos prezos públicos cara o curso 2016/2017, tendo en conta que, dada a situación macroeconómica actual os prezos públicos para o curso 2016/2017 non sufrirán incremento algún sobre os prezos establecidos para o curso 2015/2016.

Resulta polo tanto preciso proceder a aprobación do proxecto de decreto de cara ao proceso de matrícula do curso 2016/2017.

3. Tramitación

Polo que respecta á instrución na elaboración do proxecto normativo, esta acomodouse ao procedemento legal e ás prescricións contidas nos artigos 40 a 44 da Lei 16/2010, do 17 de

decembro, de organización e funcionamento da Administración xeral e o sector público autonómico de Galicia.

Así, o centro directivo impulsor remitiu á Vicesecretaría Xeral o borrador da disposición acompañado dos documentos que de seguido se relacionan, (artigo 41.2. apartados a), b), d), da Lei 16/2010, do 17 de decembro):

- Unha memoria xustificativa sobre a súa legalidade, o seu acerto e a súa oportunidade.
- Unha memoria económico-financeira.
- Unha táboa de vixencias.

Unha vez recibida a documentación e logo do seu estudo, o Servizo Técnico-Xurídico da Consellería, elaborou o preceptivo informe e obtivo a aprobación inicial do anteproxecto como proxecto pola persoa titular da Consellería de Cultura, Educación e Ordenación Universitaria (artigos 41.2 c) e 41.3 da Lei 16/2010, do 17 de decembro).

Unha vez aprobada inicialmente a disposición como proxecto, este publicouse na páxina web da Consellería (Portal de transparencia e goberno aberto), na relación dos procedementos de elaboración de disposicións administrativas de carácter xeral que estean en curso, indicando o seu obxecto e estado de tramitación, así como a posibilidade que teñen as persoas de remitir suxestións e a forma de facelo (artigo 9 c) da Lei 1/2016, do 18 de xaneiro, de transparencia e bo goberno e artigo 41.4 da Lei 16/2010, do 17 de decembro).

Na tramitación do anteproxecto e ao abeiro do esixido no artigo 42 da LOFAXGA así como na pertinente normativa sectorial de aplicación, solicitáronse, con data 28 de abril de 2016, informes á Secretaría Xeral de Igualdade e á Dirección Xeral de Planificación e Orzamentos.

A Dirección Xeral de Planificación e Orzamentos emitiu o seu informe favorable con data do 2 de maio de 2016 e a Secretaría Xeral de Igualdade emitiu o seu informe de impacto de xénero con data do 12 de maio de 2016. Así mesmo, na súa xuntanza do 8 de xuño de 2016 o pleno do



Consello Galego de Universidades acordou por unanimidade informar favorablemente o proxecto de decreto.

4. Legalidade

O proxecto someterase á aprobación definitiva da persoa titular da Consellería de Cultura, Educación e Ordenación Universitaria e finalmente remitirase á Comisión de Secretarios Xerais previa á súa aprobación polo Consello da Xunta de Galicia, segundo o artigo 43 da Lei 16/2010, do 17 de decembro.

De acordo co indicado considérase que este proxecto de decreto reúne as condicións esenciais para a súa aplicación e efectividade polo que se considera que o proxecto de decreto sometido a informe se axusta á legalidade vixente, polo que o **informa favorablemente** (artigo 43.2 da Lei 16/2010, do 17 de decembro).

Santiago de Compostela, 17 de xuño de 2016

A secretaria xeral técnica

Jesús Oitavén Barcala

